

Ice que j'oï raconter
 A mestre Robert de Chorson,
 A Paris, en un sien sermon,
 Con fetement li userier
 Va au moustier por Dieu proier.
 Li useriers est main levez,
 Trestoz ses huis a desfermez
 Por savoir s'aucuns i venist
 Qui deniers emprunter vousist.
 Lors se chance, si s'apareille,
 Sa fame et sa baiasse esveille:
 «Levez tost sus, jel vous commant,
 Et s'il vient celnz qui demant
 Deniers a emprunter sor gage,
 Gardez que n'i aie domage;
 Ainz venez erraument por moi
 A cel moustier tout en requoi.
 Je n'i ferai pas grant demeure,
 Quar l'en pert bien en petit d'eure».
 A tant s'en ist de sa meson,
 S'a commencie s'eroison:
 «Pater noster, biaux sire Dieus,
 Donez moi que je sois tieus
 Que je puisse par mon avoir
 Et le los et le pris avoir
 De gaaigner et d'amasser
 Tant que je puisse sormonter
 Trestoz les riches useriers
 Qui onques pretaissent deniers.
 Qui est in celis. Mout me poise
 Que je n'i fui, quant la borgoise
 Vint çaienz emprunter deniers.
 Mieux vousisse que li moustiers
 Et li prestres fussent fondu
 Que g'i eüsse tant perdu.
 G'i ai perdu, jel sai sanz faille,
 Le vaillant de deus et maaille,
 Qu'ele volt emprunter cinc sous.